

畿輔河道水利叢書序

良史古推馬班史記有河渠書河謂河道渠謂水利而班掾乃以溝洫志繼之歷叙漢代二百年中河流變遷此豈溝洫名篇之所能盡括蓋不惟水官失職而水學之放廢亦可見

本朝定制於經流則設總河及河道以司修防而塘堰圩圍則府州縣佐皆兼水利之銜以董之

世宗憲皇帝時因興修直隸水田特設營田水利府並設觀察副使諸官各揚其職觀建官之制而斯事之

各爲一局也。審余嘗觀史傳於疏濬蓄洩之事，輒反復之見。後人所用之法，多前賢已用者，後不嫌於襲前者，以水性終古不易，其不效者，特用之不當耳。然非留心採輯廣識而備記之，則亦不能相度機宜施之。臨事傳曰：不習爲吏視已成事，凡事皆然。行水亦其一也。竊欲分水學爲二：如防江之垵，禦海之塘，黃河之隄埽，及他廣川洪流之分合。通塞曰河道，直隸之淀泊，丹陽之圩圍，吳越之澗港，關中六輔，龍骨，陳穎，鴻郤，鉗盧，其設閘建壩，撩

淺留泥諸法曰水利各採取專門諸書以附之庶
成規犁然往復講習可資世用以合於湖州學治
事齋之遺法今姑於梓里先之直隸志乘之外無
專誌河道之書近有裒集成編者則考證爲多於
疏濬無涉惟陳學士河渠志略於道古而詳於切
今雖歲月變遷未必可盡見諸施行而利病所關
指陳剴切前已刻於

畿輔通志中

欽定四庫書亦採入又其集內因事陳辭更能獨達所見

刻直隸河渠志一卷陳學士文鈔一卷明徐尙寶
潞水客談實心探討於去位時書此持贈後人怡
賢親王奉

命總理水利時以其言爲信而有徵京東一局取爲藍本
其疏陳諸局形勢則有爲尙寶所不及者刻潞水
客談一卷怡賢親王疏鈔一卷維時興修水田六
七千頃水力羸縮無常當時已有改爲旱田者遺
跡漸湮恐難訪求以施工作纂刻營田水利圖說
一卷直隸水田自宋迄明厯經修治雖未能觀成

而良法具在散見史冊說部彙刻爲

畿輔水利輯覽一卷明左忠毅公屯田疏及

本朝水利案內皆有召募農師之語浸種插秧諸農
書具載其法加意講求可爲樹藝灌溉之助因詳
採諸農書刻澤農要錄六卷現在河道淀泊諸多
淤塞以致水潦爲災上煩

宸厯謹擬爲

畿輔水道管見暨水利營田私議亦附刻焉顏曰

畿輔河道水利叢書并期訪諸鄉郡藏書家如有先

輦遺編談斯事者及留心水學之耆宿片羽碎金
皆當續入漢時言治河者以百數桓譚典其議言
凡此數者必有一是宜詳考驗皆可豫見計定然
後舉事可以上繼禹功下除民疾區區竊取此意
冀於當事者少効芻蕘則茲刻不爲虛矣是爲序
道光四年歲在甲申余月益津吳邦慶撰

直隸河渠志

提要

謹案直隸河渠志一卷

國朝陳儀撰儀字子翹號一吾文安人康熙乙未進士官至翰林院侍講學士充霸州等處營田觀察使是編卽其經理營田時所作凡海河衛河白河淀河東淀永定河清河會同河中亭河西淀趙北口子牙河千里長隄滹沱河滏河寧晉泊還鄉河場河淀七里海二十餘水皆洪流巨浸雖敘述頗

簡質所載但及當時形勢而不詳古蹟又數十年
來屢蒙我

皇上軫念民依經營疏濬悉慶安瀾較儀作書之日水
道之通塞分合又已小殊然儀本土人又身預水
利之事于一切水性地形知之頗悉故敷陳利病
之議多而考證沿革之文少錄而存之亦足以參
稽梗槩也

直隸河渠志

翰林院侍讀學士陳儀撰

尚書禹貢一篇紀夏后行水之功司馬遷因之爲
河渠書班固繼之志溝洫皆載一代疏排之績非
如桑欽水經備敘川瀆原委也我

國家奠鼎燕京負崇山而襟滄海百川輻輳赴壑朝
宗其間順逆通塞動關生民利病

聖祖仁皇帝臨御六十餘載地平天成而於畿甸河道隄
防尤勤

五
卷
一
睿慮

巡行指授爲斯民圖萬世之安我

皇上繼志纘功大興水利

特頒內府金錢數百萬

命賢王董其事修濬兼施節宣備至以故水潤土甘年豐

人樂同符禹績非漢唐以來塞築補苴之能事也

宜爲後世法程故於諸川之外特詳志焉

渤海 在天津縣東南一百二十里明統志東連

遼海西抵直沽按直沽卽今大沽口河流入海處

也兩岸壁陡一闕中橫土人謂之海門潮汐所至
北抵楊村南抵程官屯西過王慶坨率二百餘里
皆淡水也鹹潮抵海門而止無益入者若天設之
以限內外斯亦奇矣

海河 南北運淀河之會流也自天津東北三岔
口迄大沽口長一百二十里涇廣崖深奔流湍駛
潮汐迎之則逆行而上禹貢所謂逆河是也每伏
秋之交二運並漲淀水爭趨駢注於三岔一口而
強潮牴牾洄漩不下倒漾橫流上游隄岸田廬皆

受其浸所謂尾閭不暢胷腹俱病者也故欲治直
隸之水者莫如擴達海之口而欲擴達海之口者
莫如減入口之水雍正三年

上命 怡賢親王興修水利

親授方畧於南北運各建壩開河減水分流別途歸海豈
僅爲運河計哉入口之水減則達海之口寬而北
來之永定河南來之子牙河中間七十二清河乃
得綽然入三岔口而東注朱子云治水先從低處
下手正此意也

衛河 卽南運河也亦曰永濟渠亦曰御河源出
河南衛輝府自山東武城縣流入直隸故城縣界
又東逕山東德州界復入直隸逕景州東吳橋縣
西又東北逕東光縣西又東北逕交河縣東南七
里口又東北逕泊頭鎮入南皮縣界又東北逕滄
州城西又東北逕青縣城東靜海縣城西天津府
城北至三岔口與白河會入海計長八百餘里竇
宇記永濟河在清池縣西三十里自南皮縣來入
乾寧軍亦呼爲御河金史地理志南皮東光吳橋

有永濟渠按衛河本西漢時大河所經東漢以後
爲清漳二瀆所經隋時開爲永濟渠宋皇祐初合
永濟渠仍爲大河所經南渡後大河南徙而衛河
如故金元以來皆漕運所經也有減水河二一在
滄州南十五里絕隄一在故興濟縣皆明弘治中
開以備衛河泛溢久而堙塞閘石猶有存者雍正
三年大水衛河溢決十三口 怡賢親王奉
上命查修水利奏開減水二河各建滾水石壩一座挑濬
舊河分達海港滄青水勢藉以消洩居民賴之

按南運向苦淺滯故額設淺夫以供挑挖兩岸隄工隨時補苴而已自漳河南徙於館陶入運湍急浩瀚每羨溢爲災雍正四年經 怡賢親王奏請分道專轄增汛員設歲修始以隄防爲務乃隄日增高而水亦隨長伏秋汛漲各州縣往往於隄上加埝以防漫溢蓋以漳水泥濁河形曲折墊淤於下則泛溢於上勢固然也計惟於德州上流與古黃河相近之處建壩廣三四十丈引而注之古黃河不惟直隸河隄永免漲溢卽德州一帶工程亦

獲寧謐矣但地隸山東在此爲切已之憂者在彼
未免爲秦越之視雍正八年七月德州第九屯隄
決直隸景州以下十餘州縣禾稼盡沒水利衙門
屢行咨會而決口訖未堅築蓋其地處上游水過
正堪藝麥而此間形如仰釜有受無洩縱竭力修
防隄工鞏固亦何救於田廬之湮沒耶若將臨濟
以北河道併歸直隸總河管轄則一河首尾修濬
自如上下不致阻格矣

白河 卽北運河也亦曰潞河方輿紀要白河源

出宣化府龍門縣東滴水崖東流入密雲縣之石塘嶺過縣西入通州界其支流亦從石塘嶺過懷柔縣西順義縣東入通州東境合焉東南逕潮縣武清縣東而入直沽合衛河入海又白河逕靈蹟山黃花鎮川河入焉又南逕牛欄山東麓潮河流合焉又南逕順義縣東門外順義縣志白河發源塞外白石塘嶺白馬關入故曰白河赴通州北關與溫榆河合卽運糧河性悍多沙遷徙無常俗稱爲自在河明神宗實錄萬曆三十一年從工部議挑

通州至天津白河深四尺五寸所挑沙土卽築隄
兩岸著爲令漕河圖志燕趙之間地方千里其間
巨細河流悉至武清縣丁字沽注於白河故一遇
雨潦白河滿溢要兒渡口南蔡村等處衝決隄岸
壞民田廬起夫塞築勞費萬計逮時乾旱舟行又
或淺阻以此知水勢盈涸不常不可以經久而論
也按白河會潮沽榆沙通惠諸河之水源高勢峻
有如建瓴而西北諸山泉流滙聚每伏秋之際積
雨未歇怒流已至頃刻尋丈非徒恃隄防所能捍

禦也康熙三十八年決武清縣筐兒港三十九年
聖祖仁皇帝親臨視閱

命員外牛鈕等於沖決處建減水石壩二十丈開挖引河
夾以長隄而注之塌河淀由賈家沽道洩入海河
楊村上下百餘里河平隄固有

御製碑文誌其事康熙五十年以河西務工程險要
親臨指授命牛鈕開挖引河復以河西務城東有舊河形
對新河下口至三里屯長四百餘丈

特命開直河一道次年工成於是新河之溜移流於西而

東岸大隄之汕刷以免嬰兒渡之衝險無虞矣雍正三年大水隄岸埽壩多有衝潰四年經 怡賢親王奏請北運河一切工程歸通永道統轄河西務設同知一員楊村設通判一員分界管理增置縣丞主簿等官以專防修五年河水泛溢東西岸漫決者四六年 怡賢親王奏拓筐兒港舊壩濶六十丈展挖引河改築長隄七年濬賈家沽道分減旣多消洩亦暢故壩門以下河水安流而河西務一帶距壩稍遠山水暴至遂復漫決上厘

聖懷發帑遴員授之方畧於河西務上流之青龍灣建壩
四十丈開引河而注之七里海仍展挖寧車沽河
導七里海水而洩之北塘口上下分消區畫盡善
運道民生均獲寧謐而所費帑金已不下六十餘
萬矣

淀河 在天津縣北五里永定子牙清河之會流
也自河頭至丁字沽入北運河長四十里淀水浩
淼至此始有崖岸故名河頭

東淀 延袤霸州文安大城武清東安靜海之境

東西亘一百六十餘里南北二三十里及六七十里不等蓋七十二清河之所匯潏也永定河自西北來子牙河自西南來咸入之

永定河 亦曰盧溝河亦曰渾河亦曰桑乾河永定之名

聖祖仁皇帝所命也明外史河渠志桑乾河發源太原之天池伏流至朔州馬邑雷山之陽有金龍池者渾泉溢出是爲桑乾東下大同右定橋抵宣府保安州雁門雲中應州諸水皆會穿西山入宛平界東

南至看丹口分爲二其一東由通州高麗莊入白
河其一南流霸州合易水至天津丁字沽入漕河
是河過懷來東兩山間不得肆至都城西四十里
石徑山之東地平土疏衝激震蕩遷徙弗常元史
名曰小黃河以其流濁也金史禮志大定十九年
有司言盧溝河水勢泛溢齧民田乞官爲封冊神號
特封安平侯建廟祀河渠志大定二十七年宰臣
以孟家山金口閘視都城高一百四十餘丈倘遇
暴漲其害匪細若固塞之則所灌稻田俱爲陸地

種植禾麥亦非曠土上是其言遣使塞之二十九年以涉者病河流湍急詔命造舟旣而更命建石橋明昌三年三月成勅命名曰廣利卽今之盧溝橋也元史郭守敬傳至元二年授都水少監言金時自燕京之西麻峪村分盧溝一支東流穿西山而出是爲金口其水自金口以東燕京以北灌田若干頃其利不可勝計今若按視故蹟使水得流通上可以致西山之利下可以廣京師之漕又言當於金口西預開減水河西南還大河令其深廣

以防漲水突入之患帝善之明宣宗實錄戶部侍郎王佐言通州至河西務河道淺漕船動以千計兼四方商旅舟楫往來無港汊可泊張家灣西舊有渾河若加疏濬近京一二十里更使充廣瀦爲巨浸令可泊船公私兩便上命都督馮斌等審視七年冬斌等以圖進上以其役重大姑止固安縣志桑乾河自盧溝下流入縣境明嘉靖初徙縣北十餘里東流至縣東紀家莊北分爲二萬厯中又徙縣西十餘里東南流逕黃垆之北而東南入霸

州界尋又徙縣南大隄下後復徙北我

朝順治十一年由縣西宮村與清水合流而南入新城界永清縣志明萬厯三年撫臣王一鶚修築河隄延袤五十餘里障水東流三十三年復抵縣界直逼城垣我

朝順治八年徙固安迤西幾七十里與白溝河合流霸州志明正德初在州南門外嘉靖中徙州城北後徙固安北十里鋪其支流則自半壁店李家口繞州東北境由鋪疙疸白墳採木營達信安我

朝順治中每決於固安之叵羅堡由州治西城北東
入清河後更決於新城之九花臺南里諸口而州
城之西南竟成巨河矣康熙戊辰仍從善來營入
玉帶河俗謂之霸州河按盧溝亦曰黑水河水色
最濁其急如箭東決則西淤倏忽遷改前人謂之
無定河自元厯明冲齧奔潰屢修屢決迄無寧歲
康熙三十七年三月我

聖祖仁皇帝軫念郊圻親臨視閱命撫臣于成龍大築隄
堰疏濬兼施自宛平之盧溝橋至永清之朱家莊

滙狼城河注西沽以達於海延袤二百餘里廣十
五丈五月工告成

賜名永定河

勅建河神廟

御製碑文以記之自是湍水軌道橫流以寧三十年來河
無遷徙此從古所未有也惟是下流入淀之後水
渙泥停積漸闡淤蒙

聖祖諭旨屢下毋令壅礙清流而該管分司衙門惟事修
防不加疏導淤而南信安勝芳等淀變爲高原復

淤而北策城新張諸泊墊爲平陸駸駸乎及於台
頭與子牙河會壅闕清流幾無達津之路矣雍正
三年 怡賢親王奉

命查修水利

上諭令引渾河別由一道入海毋使令入淀大哉

王言已攬河道全局而居其要矣蓋淀泊之用有翁受之
功亦有停蓄之利衆流競趨滙爲巨澤容與蕩漾
有以緩其奔突之勢然後安流弭節而去則其衝
易受而其患易禦正定順德廣平之有南北二泊

猶順天保定河間之有東西二淀皆天地造設自然之妙納衆流而節宣之不使之一往衝突而不可禦也西淀之水會爲一河分爲三汊而滙於東淀南泊之水注於北泊北泊之水出滏陽之道合滹沱之流亦由子牙一河歸於東淀則東淀一區所以蓄直隸全局之水游行而節宣之乃永定濁流闐淤梗噎於其間則上游之氾濫者將安歸乎

怡賢親王欽遵

諭旨於郭家務改河東行復開下流之長洵河引逕三角

淀而注之河頭與清河會周築三角淀圍隄以防
其北軼又以河性善淤奏明逐年挖淺俾河流不
致遷徙籌畫可謂盡善而河官錮習不利於挖淺
而利於築隄改河之後隄日增高而河亦與之俱
長長洶河淤塞絕流三角淀所餘無幾於是散漫
南行頭道河二道河皆成斷港剩有楊家一河若
經汛之後再淤而南則清水無路歸津側注於楊
柳青一帶而濁流復從而迸注之其不至穿運而
過者幾希此目前之大患全局之深病也爲今之

計惟疏挖長洶導之東注河頭南岸接築長隄至
楊家河而止雖不能必其不再淤而旋淤旋挖是
亦可暫爲補救矣

按永定濁泥善肥苗稼凡所淤處變瘠爲沃其收
數倍涇水之富關中漳水之富鄴下不是過也河
所經由兩岸窪鹹之地甚多若相其高下開濬長
渠如懷來保安石徑山引灌之法分道澆溉則斥
鹵變爲肥饒而分水之道旣多則奔騰之勢自減
從高而下自近而遠一河之潤可及十餘州縣此

亦轉害爲利之一奇也惟在任事者不避勞怨持
議者不惑浮言則鄭國史起之功安在不復見於
今日乎

清河 卽淀池之經流也其派有三分自會同河
之三汊口逕台山而北出紀家淀而東入勝滂河
者此西派也由趙家房逕托蓮泊出郭家窪會勝
滂河者此東派也由下馬頭逕崔家房入張家嘴
過任家莊逕左家莊泊歸石溝河者此南派也沿
大隄而東逕西馬頭堂頭左家莊會石溝河則其

支流也勝滂石溝二河總歸臺頭一河經羊芬港
而出楊家河楊家河至三汊口計長一百四十里
自永定下流入淀勝滂河淤而東西二派無下口
張家嘴淤而南派無正流惟沿隄一支寬不過二
三丈深不過五六尺何以容西來決潏無涯之巨
浸乎雍正三年自崔家房以東決隄九處各數十
丈文安城郭宛在水中 怡賢親王奉

命查修水利開勝滂河十七里而東西二派下口遂通挖
張家嘴河五里而沿隄一支分流北注又於上流

疏濬中亭河四十餘里自口頭對岸之下河門分引玉帶河水入臺山河其下流石溝臺頭淤淺之處槩行撈挖數載以來清流湍駛隄防晏如霸保文大之間禾黍豐而稷稻熟民享樂利皆

聖主勤恤之德 賢王治淀之功也

按以上諸河經由泊港菰蘆叢生芴草密布壅溜停汎易致淤淺淺阻之後舟楫不行復成斷塞雖分隸河道統轄而該管汛員惟知保守隄工至於淀之通塞河之淤暢俱在茫茫積浸中爲考成所

不及誰復過而問之殊不知淀河一塞分消無路
西來之水并注隄下一遇積雨暴漲頃刻尋丈雖
有人力將安所施故防隄而不濬河非計也今中
亭河苦淺趙家房河苦淤張家嘴未達於淀泊沿
隄一河自堂頭以下至壩嘴頭亦苦淺石溝通勝
勞一河苦隘勝勞至臺頭一河苦淺計其丈里非
水涸時與大工隨宜疏濬不可

會同河 一統志在霸州南十三里又名苑口河
本玉帶河也自保定縣流入州界又東北曲折行

可十里爲善來營北岸有渾河口又東可五里爲苑家口又東五里爲蘇家橋河流至此分爲三道卽所謂三汉口也冊說玉帶河至本州境會渾河東下名會同河分二支俱流經文安縣境散入石城等淀本河正派至州東無梁閣名邊家河又分一支入永清縣界名信安河其正流曲折而東入文爾諸淀又東逕東安縣界爲呂公河按會同爲玉帶之下流出自西淀之茅兒灣至霸州而拒馬桑乾胡良霸水皆會焉故名會同河今諸河俱已

改流惟栲栳圈一河南北相望卽中亭河也首尾
皆淤斷而會同河身寬不逾二十丈或十五六丈
總會順天保定正定三府西山一帶三十餘河之
水勢不能容則蕩擊爲暴決何家道口決鹿疇決
下武各莊決保定縣幾無虛歲雍正五年中亭河
開通分流北去玉帶之水十減二三但河身本淺
於正流而新開之牯牛河自西栲栳圈會入挾擁
泥沙復加闔淤則浚治之工有不可一日緩者其
會同下流之信安河已成陸地卽勝滂至辛張逕

褚沽東沽二港達王慶坨一支名呂公河者亦無
河形惟餘臺頭一派爲正流則上自石溝下至楊
家河通塞淤暢所關最鉅此河道全局之利害也
中亭河 亦名新挑河一統志在霸州南八里綿
亘數十里按此卽古中亭河也亦曰栲栳圈河康
熙三十八年

聖祖命河臣王新命開挑上接十望河下入臺山河分減
玉帶河水勢發帑築隄上下各六工上六工距河
稍遠以護州治下六工縷河爲隄以護田廬增設

州判一員管理每歲按里出夫隨時修補後渾河淤至勝芳下流遂塞而十望河自張青口來者爲白溝流沙墊淤上流亦斷自是隄工殘廢而下六工無復遺址與積淀相連雍正三年 怡賢親王奏開中亭十望二河四年中亭河工竣十望河以積水未開五年大水難以興工遂罷十望之役自口頭對岸之下河門挑引河一道分玉帶河水而注之中亭河增設吏目一員分汛防修七年州判陳起唐捐貲修築下六工隄長四十里

西淀 跨雄新數邑之境既廣且深西北諸山之
水皆滙焉北自雄縣來者曰白溝河拒馬之下流
也拒馬發源易州廣昌之涑山至房山鐵鎖崖分
爲二派一派東入涿州過新城而南挾河琉璃河
廣陽鹽溝諸水白玉塘西域寺甘池諸泉皆入之
一派南入涑水經定興而東易州之濡水武水白
楊虎眼梁村馬跑諸泉及遵欄河女思澗子莊溪
諸水俱來會之二派合流爲白溝河入柴伙淀西
自安州來者曰依城河曹河徐河一畝雞距方順

龍泉諸水之所會也徐水出五迴嶺經滿城至安
肅而曹水會焉一畝泉出滿城東南餘小泉以百
數雞距紅花名最著流經清苑城南至糧河橋而
方順水來會之方順卽曲逆河祁水之下流也五
雲石曰二泉流爲放水河五郎河入焉流逕石橋
村至糧河橋與一畝泉河會流逕新橋而滿城之
龍泉河自南來入之至善馬廟與徐河合流爲依
城河入雜淀西北自安肅來者曰雹河源出石獸
崗灌河入之由新安之黑龍口歸雜淀新安三面

皆水惟城北爲乾土而地處容城下流雨潦南下
則大澱淀一帶盡爲鄰壑墟里蕭條最稱貧瘠雍正三年
怡賢親王奏請於三台村開引雹河逕
小王營尙村之北至南河頭入燒車淀南岸築隄
建閘以裨節宣隄內大澱淀數百頃皆引流種稻
屢獲豐收澤國已成樂土矣南自高陽來者曰豬
龍河唐沙滋三水之所會也唐河原名滌水源自
山西靈邱入唐縣爲唐河恒水自西北來會居民
引以溉稻直達下素町畦相望經曲陽之鎮里高

門所漑尤多南入定州而白龍泉復來會之王謙
王耨等村傍河皆圩岸也沙河來自山西之繁峙
入曲陽界合平陽河南流阜平之當城臙脂二河
行唐之郜河咸會焉其上流亦名派水經新樂歷
定州沿流多資灌溉滋河發源山西之枚回山經
靈壽爲慈水七祖寨全頭大明川壅流可田入行
唐之張茂村伏焉至無極南孟社而復出遶縣北
旋經深澤之龍泉固沃仁橋疏流成渠皆天然水
利也三水頗稱鉅流畢會於邴州之三岔口爲豬

龍河逕博野蠡縣高陽而入白洋淀豬龍河水性
湍急奔騰最難捍禦雍正三年決柴淀口而東潰
蠡埝口古隄直衝鄭州驛路十里浸爲巨澤 怡
賢親王親歷相度疏通豬龍故道決口始塞驛路
復通然下流歸淀之處河道紆迴停沙壅溜易致
橫決復令清河道王紘於出岸村開挖引河十里
至孟仲峯出口東岸築二壩以防其軼西岸截沙
嘴以順其流然後安流入淀又於放水口斜築長
隄以禦倒漾蠡埝口殘隄數十里亦一例加修以

爲重障於是豬龍順軌瀕河田疇比年豐稔但自
邢州以下岸土挾沙最易坍塌岸坍則隄無所附
宜於頂溜掃灣建築挑水迎水等壩護岸以固隄
根其下口歸淀之處近有淤沙漲起抵闕河流亦
宜開挖以順水勢

趙北口 居西淀之中舊有石橋八座白洋諸淀
之水皆由橋下東流實西淀之咽喉也而石橋卑
隘礙流雍正三年 怡賢親王奏請易之以木升
高加濶又增建三橋俾積淀之水暢然東注但白

溝濁水自北而下出河門而橫截清流至藥王行
宮前河形拗折土人謂之鷺頸所謂咽喉已通而
胷膈未利也雍正四年委員挑挖經汛而其淤如
故蓋白溝漲時近自諸山而下推擁泥沙所至填
淤四十里之柴伙淀變爲桑田者什三四矣不加
浚治則西來諸水泛溢無歸若歲歲撈挖是勞費
無已時也渾流入淀其害往往而然欲爲一勞永
逸之計必不使之入淀而後可查白溝故道行於
淀外自龍灣而東逕道務馬務頭洪城出張青口

河形宛然宜疏濬深通導白溝之流復於故道塞其入淀之口然後將河門淺阻鷺穎拗折之處盡行挑挖如此則清濁分流淀清而河亦暢矣

子牙河 在大城縣東亦名沿河大城縣志沿河自河間縣之龍華橋轉入縣西南二十五里之馬村東北流逕十里灣自南而東逕白洋渡四呈口至縣東二十五里滙黑龍港河亦名交河從而北折繞縣東十二里趙扶村又北逕子牙村故名子牙河亦名鹽河冊說鹽河在縣南十里自河間流

入分二支一西北流入文安縣石城淀一北流又分三支西一支入文安黑母淀東一支入大小窩口中一支入霸州文爾淀匯於武清縣三角淀入白河按子牙河總會南北二泊滏漳諸水終以滹沱爲經流其湍悍迅激渾濁衝墊性與餘河異水經所云右出爲澱北爲澱口者是也伏秋汛發奔騰湧溢河間以北靜海以南皆被其害康熙三十九年

聖祖仁皇帝親閱河工

特授方畧

頒發帑金於獻縣河間東西兩岸高築長隄西接大城東
接青縣靜海各二百餘里又於廣福樓之焦家口
開新河一道東北至賈口入淀特設分司一員董
其事令河間府同知分轄增置縣丞主簿等官專
汛防修自是河大青靜之民始有寧宇矣嗣後雍
正三年分司不得其人河員怠於其職隄多潰決
怡賢親王奏准動帑修築又奏請撤回分司歸天
津河道統轄

按子牙河至王家口入淀之處分爲二派一派西
流逕支安土橋村至趙家莊又分二支西支抵支
安大隄而北至龍塘灣北支逕三灘里至張官營
抵石溝河往往橫截清流兼爲隄防害一派東北
流逕瓦子頭斷隄村岳莊莊頭村過王家泊抵台
頭會清河而東雍正三年經 怡賢親王奏請障
其西流約束歸一四年令清河道王紘相度工費
及汎水過後西支自淤正流俱由瓦子頭一支而
莊頭村南舊有私河一道東由陳家泊歸獨流大

坑急溜衝刷遂通舟楫此亦水自遂其東下之性
非人力所爲然順而導之再加疏濬俾全河之勢
盡歸大坑則台頭一河無復渾濁之擾清水可以
暢流矣再子牙河新河入淀之處東西相距二十
餘里兩河之隄南連而北缺兩隄之間村落數十
地皆肥美但北面無隄每遇二河漲溢淀水倒漾
則數十村落皆在水中而河員猶守兩隄惟謹幸
獲無虞則自以爲功此如防盜者守墻垣而開後
戶盜入胠篋發匱而去垣墻守者猶巡警徹夜此

何爲者也故北面之隄斷宜接築查王家口村南
東岸有古河一道名三家淀河緣東隄出瓦子頭
橋下迤邐東北與新河合而入淀雖已淤淺河形
宛然若挑挖深通亦可分正流之漲挑河之土卽
用以築隄補缺成圍圍內之地分別高下疏列溝
塍於西南建閘引漑東北洩而出之一舉而河隄
兩成營田亦就矣再查新河形勢由西南而趨東
北從高就下直注獨流大坑甚爲徑捷但河身淺
狹隄岸殘缺若深濬而堅築之於焦家口分流之

處建挑水壩逼子牙之溜移入新河刮刷愈深則
王家口以上無羨溢之虞卽台頭一帶亦免墊淤
之患矣

千里長隄 起清苑縣界訖獻縣之臧家橋週迴
於順天保定河間三府之境長千有餘里沿河繞
淀爲數十州縣生民之保障康熙三十五年大水
多漫決圻頽我

聖祖軫念郊圻頒發帑金

命河臣王新命徧行查勘一例加修增設縣丞主簿等官

管理隄固河平民享樂利者二十餘載雍正三年大水漫決尤甚存者亦大半殘缺四年

上命

怡賢親王委員領帑畫地修築加厚增高統於是秋告竣奏隸河道統轄董理責成工程日以堅固迄今六載高下豐稔瀕河近淀州縣井閭皆歌樂土焉

滹沱河 源出山西代州繁峙縣太戲山流經太原孟縣北始入直隸平山縣北又東逕靈壽縣南入正定縣界周禮職方氏并州川滹池戰國策趙

攻中山以擅滹沱漢書郡國志蒲吾註永平十年
作常山滹沱河蒲吾渠通漕隋圖經魏改爲清寧
河唐書五行志永淳二年八月恒州滹沱河及山
水暴溢害稼開成元年七月鎮州滹沱河溢害稼
隄防考宋天聖間曹馬口隄壞尋復修築金史河
渠志滹沱河大定八年犯正定命發民夫繕完隄
岸元史河渠志延祐七年正定路言正定縣滹沱
河北決隄寢近城每歲修築聞其原本微與冶河
不相通後二水合其勢遂猛惟闢冶河自作一流

滹沱水十退三四正定府志明成化八年由正定出晉
州紫城口南入寧晉泊正德十三年紫城口淤塞淺漫
分爲二股一股仍由寧晉泊一股東溢由東鹿鴉兒河
入深州界遣夫於涇槃集迺東修築隄岸障東溢之水
歸寧晉故道工甫畢而秋水漲將南流仍併東行入東
鹿界嘉靖十一年遣太僕卿何棟相視回奏晉州地形
西高東下水性就下遂失故道議於藁城張村起至晉
州故壩止厚築長隄障歸故道不果其後逕州南關外我
朝順治十三年又南徙由藁城南彭村逕晉州周頭

村北釣魚臺龐家莊胡士莊寨入東鹿百尺口橋
至冀州歸清水河並行按滹沱水急流濁所至填
淤自入寧晉洎滏澧水道俱受其壅塞雍正三年
東徙決周頭村直衝東鹿環城而流瀾漫四野四
年 怡賢親王奉

命查勘東邑官民籲請障歸故道仍入寧晉洎 賢王以
洎乃三郡河流匯歸之地有翕受節宣之功豈可
復聽濁流淤塞致衆水無歸漲溢爲害乃親行相
度得舊河一道由木邱南至焦岡入滏河委員自

第四溝開挖一路疏濬深通於周頭築壩障其東下而導之南流自是束深無衝潰之虞泊水免淤塞之患矣

接滹沱之在山西本非巨川至平山合冶河而始大冶河一名甘陶河源自山西平定州之崧嶺流至平山初不與滹水相通元初鑿而合之其勢遂猛延祐間引闢冶河害已減半後冶河下流漸塞復入滹沱歲有潰決之患皇慶中議復之而未果怡賢親王於敬陳畿輔西南水利情形疏內奏請

塞治河入滹之路循其故流加以挖濬引入涑河
誠爲一勞永逸之計

滏陽河 亦名滏水源出磁州神麴山東北流經
邯鄲縣東三里會渚沁二水冊說渚河又名塔水
在邯鄲縣南五里發源紫山逕城西南入滏陽河
沁河在邯鄲西一里發源紫山逕城西入滏陽河
寰宇記滏陽縣滏水源出縣西北鼓山南巖下泉
源奮涌若釜之揚湯故以滏口名之其水冬溫夏
冷元史郭守敬傳守敬面陳水利四事其四磁州

東北滄漳二水合流處引水由滄陽邯鄲洺州永
年下經雞澤合入澧河可灌田三千餘頃明外史
河渠志滄陽河舊在任縣新店村東北源出磁州
逕永年曲周平鄉至穆家口會百泉等河北流明
永樂間漳河決而與合二水每並爲患至景泰間
又合漳衝曲周諸縣沿河之地皆築隄備之成化
間舊河淤衝新店西南爲新河合沙洺等河入穆
家口亦築隄備之一統志舊滄河在雞澤縣西自
永年通水閘北流經此又北達平鄉縣入寧晉泊

舊道紆曲不能容常潰決爲民患我

朝康熙七年知縣姜照挑濬新河以導其流自馮鄭
村至亭自頭長二里許六方等村永無水害

按滏陽河舊合滹故多衝溢今漳水東徙經魏縣元
城抵館陶入衛不與滏合滏水獨行貫寧晉泊而
出至衡水縣界滹沱河出焦岡合流逕冀州武強
獻縣河間青縣大城入淀名子牙河其支流自完
固口逕杜林鎮抵青縣之鮑家嘴入南運河近已
淤淺惟子牙一支爲巨津焉自寧晉泊以上滏水

所經州縣多引流種稻沿河開座甚多而磁州之民欲專水利以致下流稻田多廢爭訟累歲不休雍正四年 怡賢親王奏稱查廣平府舊志磁州屬廣平路領成安今成安現隸廣平則磁州本非豫屬明矣請將磁州改歸廣平府則滏陽一河全由直隸統轄均水息爭同安樂利矣奉

旨怡親王奏請將磁州改歸廣平府管轄以收滏陽水利稽考誌書相度地勢援古證今俱爲符協似於廣郡一帶民田大有裨益着九卿會議具奏嗣經戶部議覆應

如所請行自是廣平以下均沾河潤各州縣管田
多至二千餘頃從前斤鹵盡爲稻鄉矣

按滏河隄岸例係瀕河村莊修築工多力寡難免
潰決應照千里長隄之例將該州縣所有隄工丈
尺查明按通邑里甲攤派均修造冊存案永著爲
令工少人多自成鞏固矣出泊以下水勢倍增會
以滹沱湍悍之流所有民堰難資捍禦雍正八年
衡水隄決滋流直犯青縣可爲寒心應將臧家橋
以上直至衡冀一帶民堰令地方官查估動帑增

修工竣仍照千里長隄例令民間年年修補

寧晉泊 一名胡盧河在寧晉縣東南自隆平縣

流入又東北入冀州界宋史河渠志熙寧八年發
夫增治胡盧河舊志在縣東南二十里東西徑三十
里其上流卽漳水與滏水合流滙大小羣川注此
土人稱爲寧晉泊卽北泊也洩河冶河沙河沛河
槐河午河李陽河七里河滏陽河咸入焉自滹沱
河南徙由賈口而入淤塞滏河故道三十餘里水
無所洩遂衝決洩口營上等村而東注水口河身

亦多淺隘雍正三年濬沱東徙不復入泊四年

怡賢親王奏請開挖自黃兒營至營上村一路展寬濬深泊水始得暢洩

大陸澤 一名廣阿澤在任縣土人謂之張家泊
元和志大陸澤一名鉅鹿在縣西北五里東西二
十里南北三十里葭蘆菱蓮魚蟹之類充牣其中
卽南泊也百泉牛尾野澧沙沼劉累程二寨聖水
順水蔡馬柳林等河咸入焉北有穆家口河洩之
於北泊東有雞爪張滋等五溝洩之於滏河縣志

弘治時涸水沟澤九河舉發衝決隄防下流隆平
縣淤窒壅塞者四十餘里隆平鉅鹿均被其害而
任縣居多嘉靖六年發正定順德二府夫役同浚
之自穆家口至羊毛圪塔四十里深廣各丈餘水
得其性隆鉅復膏壤而任之水患亦息我

朝順治十八年重濬日久堙塞而五溝亦淤其三祇
有雞爪張滋不絕如縷有所受而無所洩伏秋漲
溢爲瀕澤居民田廬害雍正四年 怡賢親王奉

命查勘委員開穆家口河長四十里挑河之土卽以夾築

長隄導澤水而注之北泊其雞爪等溝亦加疏滌
於是水患旣除水利亦興邢家灣南邊家莊北引
流種稻營田數百頃

按南北二泊正定廣平順德三府之水會也西帶
重山二十餘河之水建瓴而下每遇伏秋之際千
巖飛雨萬壑懸流若無二泊爲之翕受而節宣之
其奔衝橫溢爲何如哉故南之有南北二泊猶北
之有東西兩淀皆治水者所當加之意也滹水嘗
入北泊塞河口而環泊州縣受漲溢之害者多年

漳河合滏溷入南泊而穆家雞爪等河塞遂致中
滿旁溢任隆之民坐受其浸今幸滹漳遠徙賢
王施疏濬之功州郡享平成之利此千載一時也
然二水之故瀆尙存濁流之遷徙靡定旣可以不
祛而去詎難於不引而來且前明之世有障滹沱
而歸寧晉以爲故道者矣有請濬穆家口仍俾漳
滏會流者矣或暫免一方之害或微規目前之利
而不知統計全局之利害其貽患不僅在一時也
故謹著之又按入泊諸水自涑澧百泉牛尾聖水

等河恒流不竭外其餘春夏每多枯涸然前人載
之圖誌設有橋座蓋以爲攝水歸泊之道也雨集
山漲由此脈分縷析而注之大泊之中田間無宿
潦焉其爲功也大矣有司不知浚治或反聽民佔
耕一旦山水暴來則奔騰四野爲田疇害雍正四
年 怡賢親王奏明委員查勘酌量疏通五年復
檄行各地方官隨宜濬治毋得聽其堙塞而有司
具文視之不知奉行八年秋雨多水溢環泊十餘
州縣皆罹其災上厪

聖懷遣官發帑徧行賑濟既過之後官民晏然又復不以

爲事昔陸隴其爲靈壽令令民挖濬衛河其始頗有怨言以爲開無水之河徒勞民力隴其不顧卒成之已而霖雨水大至賴此河宣洩遂以有秋至今民猶懷之此賢達之遠見也 怡賢親王於通

州武清地方開挖鳳河於香河寶坻地方開挖窩頭鮑邱二河於良鄉涿州固安霸州地方開挖牯牛河收攝野潦俾有所歸數載以來民享其利

鳳河 名勝志鳳河水一渠從西流至鳳窩村雖

隆冬沍寒水亦不冰東安縣志在縣東北四十里
鳳窩村其水自縣西北草橋來又南流過縣之漂
流淀又南入武清三角淀其形如鳳此鳳河所出
名也按鳳河之源在

南苑中流出東南隅自迴城而東涓涓一帶東南流
至武清之堠上村河身深廣以下填淤斷續一遇
伏秋雨潦散漫無歸雍正四年怡賢親王奉

命查修水利欲加疏濬而來源微細不足以爲恒流查有
凉水河一道發源水頭莊貫

南苑出宏仁橋東流至高各莊東北流抵張灣入運
乃奏請於高各莊分流南引至墩上入鳳河故道
一路挑挖過雙口抵青沽港入淀河仍於分流之
處各建一閘水小則閉東閘啟南閘流入鳳河水
大則閉南閘啟東閘洩入運河次年河成宛平灤
縣武清東安一帶積潦盡消桐林牛鎮三間房等
處開渠引水各營田數十頃惟閘座未建每年築
壩蓄流以資灌溉

牝牛河 在良鄉縣東南鹽溝廣陽二河之會流

也鹽溝源出宛平縣龍門口東南經縣東南陶村
卽古福祿水也水經注聖水又東廣陽水注之水
出小廣陽西山東逕廣陽故城北又東福祿水注
焉水出西山東南流逕廣陽故城南東入廣陽水
按鹽溝廣陽二水至良鄉縣城東南合流爲三义
口南流至任邨西南入大清河一遇伏秋山水漲
發奔騰衝突故土人謂之牝牛河良涿固霸之間
累被其害雍正四年 怡賢親王奏請於任邨之
南開挑新河東南逕涿州界東逕固安縣西北循

盧溝河故道南逕霸州之南孟等邨東南抵西栲
栲圈入中亭河長二百餘里自是奔突患息野潦
有歸四州縣秋禾皆獲豐稔

窩頭河 卽蒼頭河一統志在香河縣西北二十
里上通牛欄山水窩頭莊水下通三路隄口一由
李家園坑隄口入北吳村一由明星堂坨口入甘
十八隄口一由東凌莊尹家河沙務莊張家灰店
南吳村牛家屯入板罾口運河按此河水本無源
伏秋汛發衆流會於窩頭逕香河縣百家灣東與

渠水合流東逕七里莊入寶坻縣界東過城南之
西石橋至王補莊與鮑邱河會

鮑邱河 源出密雲北山逕三河縣之夏店東南
逕虎將莊入寶坻縣界東逕縣北齊河務蕭家埕
東南至王補莊與窩頭河會過林亭口張家莊至
周家莊東南逕尹家莊又東由八門城入薊運河
按二河原無恒流上受通州三河雨潦之水泛溢
而下下流淤塞斷續無路消洩香河首受其浸而
寶坻地形如釜一遭淹沒經年不涸爲害尤劇雍

正四年 怡賢親王親歷相度奏請疏通窩頭河
自百家灣起鮑邱河自魚椿起分道挑挖或循舊
流或取直徑遶縣之南北皆會於王補莊其八門
城出口河身淺窄紆曲乃自林亭口別開直河一
道至尹家莊寬江入薊運河寬深暢利數年以來
香寶田疇高下皆稔無氾溢之患矣此外古河故
瀆所在多有與鳳河近者有古龍河與南運河近
者有古漳河阜城交河之境有古清河與滏河近
者有滹沱故道深冀等州衡武等縣皆有之又武

強縣有龍治河衡水縣有古鹽河棗強縣有黃瀘
河清豐南樂等縣有馬頰朱龍二河其他不及悉
載此等古河雖無來源皆堪行水而沿河小民貪
圖微利往往占耕爲業或地處下流曲防攔截以
致脈絡不通一旦雨水聚匯則橫溢而出其受其
浸夫王政之大者莫如盡力溝洫直隸沃野千里
川流百道而霖雨偶多則平陸行舟此無溝洫之
故也 賢王開疏四河以著明效因以風示有位
欲其則倣奉行凡各屬所有古瀆舊港因勢乘便

酌量開通其過溝洫遠矣近泊者導之入泊近河者導之入河近淀者導之入淀委曲貫通流而不窒則潦水各有所歸何至瀰漫爲害留心民瘼者幸加之意焉

京東諸水不於天津歸海故自別爲一局其經流之大者莫如灤餘若石河湯河洋河潮河清水河陡河皆獨行赴海其他枝津別派附巨川而朝宗者數十百道詳已見於山川矣不復具列取其曾經修濬有關民生利病者著於篇

蘄運河 一名潮河乃沙河沽河洵河淋河黃顏
諸水之會流也寶坻縣志潮河在縣東二十里自
三河縣流入至縣東北三岔口與洵河及蘄州之
沽河會流曰運糧河一名白龍港又東南至縣東
九十里名豐臺河亦名懷襄河共南流過梁城所
蘆臺抵北塘口入海又考蘄運河源出遷安縣三
台營會遵化諸山泉之水俗名沙河逕遵化州城
南西南流至張七各莊折向西流逕水門口湯泉
自西北來入之又西南入蘄州東界淋河合輿龍

口之水自北來會焉又西南至南河莊薊州北山
諸泉水來入之逕城南五里橋迤邐西南流逕上
倉折向南流至下倉折向西流至嘴頭村洵河合
周村黃頌等河自西北來會之至白龍港入寶坻
縣界淤泥河自西南來入之折向東南流逕新安
鎮至小河口小泉河合藍泉水自北來入之逕曹
家口頭折而南至于家口頭迤邐西南流至大沽
莊復折而東南至王家莊又折而西逕長亭店復
折而南逕八門城迤邐東南流至盛家莊還鄉河

北支自東北來會又東南至江潢口還鄉河南支
自東北來入之逕梁城所北分流環城仍合于城
南又東南逕蘆台軍糧城會天津新河入海

統按蘆運河源高派繁河形曲折每汛發漲溢潰
決隄岸淹沒田廬而寶坻地勢最下受害尤劇雍
正四年 怡賢親王奏請築隄起自三河縣之料
馬莊迄於寶坻縣之江潢口長一百八十餘里屹
然高厚居民以爲保障焉又以隄內地窪西北一
帶村莊雨潦停積每妨耕稼委舊令程璇相度於

魯沽莊建石閘一座長亭莊建涵洞一座又於張頭窩建涵洞一座潮汐通流民間得以汲飲兼資灌溉雨水過多則洩而出之從此寶坻永離昏墊比年豐稔稱畿東樂國矣

還鄉河 卽溲水亦名環香河源出遷安縣泉莊黃山之麓一泉涌出滙爲方塘澄碧中噴珠纍纍西流成河水勢甚駛至岩兒口入豐潤之東北界又西逕五峰頭至韓家厓頭迤邐西南流至窪峇村折而南逕東馬莊又折而西逕豐潤城北迤邐

西南流至張官屯入玉田縣之東南界又西南至
蠻子營沙流河自北來入之逕鴉鴻橋至運河頭
復折而南自此河身頓狹斗折蛇行至趙官屯分
爲二股一西南流逕椽子莊牛見頭至盛家莊入
薊運河一南流逕九丈窩豐臺鎮至江潢口入薊
運河方輿紀要漚水一名還鄉河或謂之雲漚水
燕山叢談凡水皆自西而東此水獨西俗謂之還
鄉河水利備考明初用遮洋船從直沽出海轉餉
薊州天順二年開直沽河歲久復湮嘉靖四十五

年詔濬豐潤縣還鄉河轉運太平等寨軍餉於北
齊莊張官屯鴉鴻橋特設三閘以瀦水焉按還鄉
河源非甚鉅但近自北山而下夏秋雨集諸山水
潦一時迸注而鴉鴻橋以下河窄流紆不能驟洩
則溢出爲田疇害東決則淹豐潤西決則淹玉田
雍正四年 怡賢親王奏於劉欽莊王木匠莊河
流甚曲之處各開直河一道與舊河兩處分洩沿
河隄岸逐加修築其椽子莊牛見頭一帶出口河
身亦濬疏寬深沿河沮洳之場皆成膏壤矣

塌河淀 一名大河流卽北運河筐兒港藉以蓄洩者也舊隸武清縣今改隸天津縣一統志在城東北四十里周百里按此淀上無來源下通潮汐以陳家溝賈家沽二河爲出納焉南北廣十五六里東西長二十餘里東南有小河一道出西隄頭逕城兒上入七里海

七里海 卽北運河青龍灣藉以蓄洩者也一統志在寶坻縣東南一百三十里汪洋如海爲縣巨浸按七里海亦無源之水也地形窪下聚潦歸焉

海之西北爲後海後海之西北爲鯽魚洶又北爲香油洶海東南爲曲里海雨多水滙則極目無涯旱乾之年諸洶皆涸惟七里海尙有寧車沽一道下通北塘潮汐往來水常不竭然亦盈盈淺瀨而已沽道旣狹舟楫販易之所不至瀕海居民採蒿子爲糧雍正四年冬 怡賢親王查歷至此惻然憫之五年委員開挖寧車沽河起自淮魚洶達於北塘口長四十里拓濬深通賈帆來往小民生計賴以紓焉

按荒政要覽有言古之立國者必有山林川澤之
利川主流澤主聚川則從源頭達之澤則從委處
蓄之川流淤阻其害易見人皆知濬治者萬頃之
湖千畝之蕩鮮知究心甚有縱豪強阻塞規覓小
利不知澤不得川不行川不得澤不止二者相爲
體用易卦坎爲水坎則澤之象也爲上流之壑爲
下流之源全繫乎澤澤廢是無川也况國有大澤
澇可爲容旱可爲蓄必究晰於此而水利之說可
徐講矣畿輔之內大澤有六曰大陸澤曰寧晉泊

曰西淀曰東淀曰場河淀曰七里海皆以止川流而蓄聚潦焉二泊兩淀源深流長其容蓄之功易見惟場河淀與七里海旣無大源每多涸竭附近居民往往占耕爲業報墾升科而地方有司不察其爲淀與海也亦聽其阻塞或反以開荒增賦爲已最近年以來筐兒港壩口拓寬滾水浸多場河淀周圍田地率以水佔除糧計畝受價矣然此等本皆積淀偶涸成田當日若不聽其報墾豈不省此一番償補耶今七里海年來涸減浦淑變爲萊

蕪聞亦有報糧認業者寶坻地本卑窪惟近城二
三十里爲高壤故縣以坻名取水中之坻爲義也
雨水過多全恃七里海爲容蓄不致汜溢成災若
乘其減涸逐漸認耕規小利而廢此大澤所害多
矣況青龍灣壩河滾水以此爲壑一遇水多之歲
田復成海又爲之除糧給價豈不虛糜

國帑乎留心地方者當知澤之爲利凡淀泊涸出之地毋
得聽民墾認不可不通行而厲禁也